

安福縣志卷之三十

藝文一

天章 疏 議 檄 諭

昔班史紀藝文僅列篇目及有明修志乃載及詞章非體例異也志以紀事文藝卽紀事之言凡政治所繫因革所宜以及山川風物弔古言情皆有不容自已之心然後其事傳者文亦傳其人亦因以並傳福自改縣以來代有作者爰徧蒐選擇彙爲一編而宸翰天章卽以弁於其首嗚呼大雅之言猶鐘鼓也俾後起者得而考擊焉可毋向雲峯石柱間作錚錚細響

安福縣志

藝文一

一

卷之三十

矣志藝文

天章

勅封洞庭神文

維康熙十八年歲次己未七月壬申朔祭日壬子

皇帝遣禮部主事加五級鮑復業致祭於洞庭湖之神曰朕維景運長隆允藉百靈之助神明效順聿修咸秩之文是以詩誦懷柔禮敦禋祀緬稽祭義胥答鴻庥況乎肆征不庭佐國威於有赫采入其阻彰神怒之式憑幽贊聿昭褒稱宜懋惟神德符河海秀結東南納三峽之洪流滙九

江之殊派膏吳潤楚普美利以成能浴日含雲協太虛而
敷化粵自唐宋厯被崇封暨我國家彌宜偉績傾者逆氛
未靖天討用加地當師旅之屯衆賴精英之祐閱時八月
波浪無驚俾我六軍舳艫共濟堅城立拔餘孽宵奔眷言
撻伐之奇勲實屬神功之不顯特申昭告式考彝章封爲
洞庭之神載諸祀典神其永膺嘉號配嶽瀆而皆尊意著
貞符格馨香而勿替專官告祭惟神鑒知

御筆仿李迪雞雛待飼圖

乾隆五十三年十月十一日奉

上諭昨頒賞直隸省督撫御筆仿李迪雞雛待飼圖墨刻各

安福縣志

藝文一

二

卷之三十

一分蓋因朕軫念民依勤求撫字卽雛哺之微寓牧民之
旨是以特加摹勒普行頒賜非徒以幾餘遊藝留情於繪
事詩章僅令各督撫珍藏寶玩已也實欲督撫等體朕惠
愛黎元之心時時以保赤爲念遇有災賑事務實心經理
勿忘小民嗷嗷待哺之情庶幾視民如子克稱父母斯民
之責凡身膺民牧者並宜咸喻斯旨承宣德意方爲仰副
朕懷着各督撫於接奉後觸目警心勿僅視爲尋常詩書
並照式摹刻遍及藩臬道府各州縣等俾知留心民瘼勉
奏循良以期無負朕教誨勤拳至意將此通諭知之欽此

雍正元年奉

上諭州縣官愛民供職朕惟國家首重吏治爾州牧縣令乃親民之官吏治之始基也貢賦獄訟爾實司之品秩雖卑職任綦重州縣官賢民則先受其利州縣官不賢民則先受其害膺茲任者當體朝廷惠養元元之意以愛民爲先務用察葑屋綏輯鄉閭治行果有其實循卓自有其名非內聚賄而外干譽謂之名實兼收也全省吏治如作室然督撫其棟梁也司道其垣墉也州縣其基址也書云民爲邦本本固邦甯此所以固邦本在吏治吏治之本在州縣

安福縣志

藝文一

三

卷之三十

苟州縣之品行不端猶基址不立則室不固庸有濟乎

皇考臨御六十一年灼知州縣之重特行引見咨詢周試至詳至慎其有廉能之員每不次超擢以示鼓勵今海內羣黎皆

皇考所懷抱也朕膺宗社重寄思續

皇考之治功惟爾諸臣俱有父母斯民之責其爲朕之基址以固邦本焉誠能竭己奉公實行盡職一州一縣之中興仁興讓教孝教忠物阜民安刑清訟簡朕將升之朝宁用作股肱如或罔念民瘼恣意貪婪或朘削肥家或濫行逞

虐或借刻以爲清或恃才而多事或諂媚上司以貪位或任縱胥役以擾民或徇私逞欲以上虧國帑王章具在豈爾□與更有任州縣時私肥己橐而漫云且俟顯要方立名節者其與初市清名晚而改操之人何以異哉至於錢糧關係尤重絲毫顆粒皆百姓之膏脂增一分則民受一分之累減一分則民受一分之賜前有請暫加火耗抵補虧空帑項者

皇考示諭在廷不允其請爾諸臣共聞之矣今州縣火耗任意加增視爲成例民何以堪乎嗣後斷宜禁止或被上司

安福縣志

藝文一

四

卷之三十

察核或被科道糾叅必從重治罪决不寬貸夫欲清虧空之源莫如節儉正直節儉則用無不足正直則上官不可干以私若朘小民之生以飽上官之貪欲冒不測之罪以快一時之奢侈豈砥勵廉隅爲民父母之道乎爾州縣等官其恪供乃職毋貽罪戾毋謂地遠官卑朕不及察其賢否也特諭

乾隆二年奉

上諭督撫牧令勸課農桑昔者虞廷咨牧食哉維時而百揆奮庸之後卽命棄以播時百穀禮樂兵刑皆在所後良以

食爲民天一夫不耕或受之饑一女不織或受之寒而耕九餘三雖遇荒年民無菜色今天下土地不爲不廣民人不爲不衆以今之民耕今之地使皆盡力焉則儲蓄有備水旱無虞乃民之逐末者多而地之棄置者亦或有之縱云從事耕耘而黍高稻下之宜水耨火耕之異南人尙多不諳北民率置不講此非牧民者之責抑誰之責與今之督撫於地方命盜等案或官方吏治兵制夷情能盡其心者有之其以身爲之倡課百姓以農桑本務者誰也得毋與虞廷命官之意相左乎朕欲驅天下之民使皆盡力南

安福縣志

藝文一

五

卷之三十

畝而其責則在督撫牧令必身先化導毋欲速以不達毋繁擾而滋事將使逐末者漸少奢靡者知戒蓄積知勸督撫以此定牧令之短長朕卽以此課督撫之優劣至北五省之民於耕耘之術更爲疎畧是以一穀不登卽資賑濟斯豈久安長治之道其應如何勸戒百姓或延訪南人之習農者以教道之牧令有能勸民墾種一歲得穀若何三歲所儲若何視其多寡爲激勸非竒貪異酷極昏極庸者毋輕率劾去使久於其任則與民相親而勸課有成將見俗返醇樸家有蓋藏然後禮樂刑政之教可漸以講著該

部卽會同九卿詳悉定議以聞此諭

嘉慶十九年奉 頒

御書遇變罪己詔

朕以涼德仰承

皇考付託兢兢業業十有八年不敢暇豫卽位之初白蓮教煽亂四省黎民遭劫慘不忍言命將出師八年始定方期與吾赤子永樂昇平忽於九月初六日河南滑縣又起天理教匪由直隸長垣至山東曹縣亟命總督溫承惠率兵勦辦然此事究在千里之外猝於九月十五日變生肘腋

安福縣志

藝文一

六

卷之三十

禍起蕭牆天理教逆匪七十餘衆犯禁門入大內戕害兵役進宮四賊卽縶縛有執旗上牆三賊欲入養心門朕之皇次子親執烏鎗連斃二賊貝勒綿志續擊一賊始行退下大內平定實皇次子之力也隆宗門外諸王大臣督率烏鎗兵竭二日一夜之力勦捕搜拏淨盡矣我大清國一百七十年以來定鼎燕京

列祖

列宗深仁厚澤愛民如子

聖德

仁心奚能縷述朕雖未能仰紹愛民之實政亦無害民之虐事突遭此變實不可解總緣德涼愆積惟自責耳然變起一時禍積有日當今大弊在因循怠玩四字實中外之所同朕雖再三告誡舌敝唇焦奈諸臣未能領會悠忽爲政以致釀成漢唐宋明未有之事較之明季梃擊之案何啻倍蓰思及此實不忍再言矣予惟返躬修省改過正心上答

天慈下釋民怨諸臣若願爲大清國之忠良則當赤心爲國竭力盡心匡朕之咎移民之俗若自甘卑鄙則當掛冠致仕了此一身切勿尸祿保位益增朕罪筆隨淚灑通諭知之

安福縣志

藝文一

七

卷之三十

御書盡心竭力仰報

天恩諭

九月十五之變史冊所無我君臣相率怠玩於平時方罹此重罰幸承

天

祖垂佑雷厲風行大逆立誅餘邪漸熄若仍諸事怠忽村且依違是自作孽不可活矣只知私家爲重國事爲輕誠昏

愚之極矣有國然後有家國破家豈能存保國斯能保家一定之理也爲今之計密訪以滌其源安良以杜其慝譬諸虎狼噬人焉能絕其種類曳尾潛逃亦可網開一面矣以仁心化天下尙有此等逆徒若事殘暴禍不旋踵而至上蒼斷不保佑可不畏乎自今各思盡心竭力保國保家平日恩怨勿借此有事之秋先圖報復先公後私正心爲主先本後末安民爲急也邪教之起匪伊朝夕操刀犯闕詭計有年州縣懼干處分隱忍姑容養癰貽患至於如此試問地方大小官員何國之人則曰大清國之人也問其祿安福縣志

藝文一

八

卷之三十一

則曰君上之賜也問其職守則曰我不知也或曰與我何涉也朕用是寒心況本無才德之主而庸碌者居半實心保國之臣力不能敵深可悲也諸臣各盡乃心各竭乃力辦實事與朕看庶幾仰答

天恩轉禍爲福在此寸心耳願同朕志特諭中外文武知之
報

天恩肅吏治修武備諭

天佑我國家迅雷除賊大逆立擒鎗斃踰垣之盜雨熄舉火之謀餘黨全誅無一倖免朕遭非常之大變受非常之

天恩警懼之餘益深乾惕敬同內外諸臣洗心滌慮盡心盡職仰答

皇慈以迓承平之福念茲毋忽予之至願也奸民以教誘人邪說充塞積有年矣直隸山東河南自督撫至州縣豈盡聾瞽乎緣私心太重以至吏治不肅也大吏待屬員明以奔競爲才能暗以苞苴定高下遇一公務彼此推諉各顧處分上下迴護所辦無實政所議皆游辭良知泯而利心深戀人爵而輕天爵小事吹毛以求疵大事養癰而貽患叢脞疲玩怠惰因循吏治之壞至今極矣逆賊竊視官庸安福縣志

藝文一

九

卷之三十一

吏玩至於如此有何畏憚顧忌乎始則歛錢聚衆官吏不辦終則揭竿肆逆官吏不知若非

天佑尙可言哉朕無知人之明乏馭世之才屢申勸誡徒費苦心依違遷就習與性成事前則漫無覺察臨事則張皇失措事後仍漠不關心皆朕不德之所致也諸臣各勉致君澤民揚名後世切勿視此殊諭又不領會相率頌揚具摺了事真不知朕之苦心矣九重皋應何等尊嚴八旗守衛何等雄壯豈有數十逆賊哄然直進官兵空手遮攔立被殺害皆由經年累月不修軍器弓無絃矢無鏃刀鎗鈍

敝火藥潮溼日前擊賊皆用瓦礫言之可羞軍威不振毫無紀律此皆管兵大臣之咎亦朕誤用之過也逆賊盤踞京畿伏藏禁闈官吏廢弛兵丁怠惰軍器無用皆見慣之事是以大逆林清自六月至九月毫無顧慮公然佈置勾結爲奸竟無一人舉發誠怪誕之極矣近日言事諸臣可採用者立見施行留中不報者實不可行者也若顯斥其非又朕爲拒諫爲君難至朕尤難爲臣不易諸臣未必能留意體會亦太覺容易矣惟祈

上天啟迪渺躬用股肱心膂之臣同心協力挽回汚俗庶幾

安福縣志

藝文一

十

卷之三十

補救於萬一耳特諭

御製行實政論

季秋禁城之變非浮言泛論所能弭必以實心行實政庶幾補救於萬一也幾暇靜思其故終因窮困而起始則鼠竊狗偷繼以踰垣肆劫終於謀反作亂其心爲揀急度命耳加以王畿雜處不肖混迹倡立邪教妄言劫運揭竿而起直入禁城亂民罪大惡極固不待言而潛匿近畿往來約會自十六年夏季林清卽造謀定於今歲九月十五日起事先搶宮禁次劫京城旣得此地皇上必避往關東如

此逆謀已三年之久朕竟不能知實深慚愧實切痛心國家設立王公文武大臣以及侍衛章京不下千員八旗步營將弁兵士幾及十餘萬人竟無一人出首者嗚呼痛哉若云實不知覺是欺

天矣總由泄沓成風苟且從事悠忽度日怠玩居心視國事漠不相關積陋習牢不可破窮本探源總因予之德薄才疎心存姑息水懦民玩予之咎也書云威克厥愛允濟傳云猛以濟寬欲起廢策頽非共奮精神大加振作不可問矣內外臣工勿慕虛榮而貽實禍勿保一時之爵祿而遺

安福縣志

藝文一

十一

卷之三十

萬古之臭名盡心致敬實政力行激天下忠良之氣挽向來玩愒之風勿以習俗爲不足憂勿以廉恥爲不足惜民風之醜薄軌物之廢興實關繫於吏治之勤惰也禮教旣弛於平日人心久溺於非幾忠孝廉節斥爲腐談詐僞刁頑習爲秘計修禮明教秉正抑邪此實今日刻不可緩之急務也我朝

龍興東海定鼎燕京八旗勁旅一可當百今居舊土之兵嫻熟騎射未致廢弛而從居京師者僅健銳火器二營日事操演畧覺可觀若前鋒護軍驍騎諸營雖有其名而無

其實軍器鈍敝技藝生疎歲糜帑項幾及百萬而管理諸王大臣不知教訓不勤練習除挑補差缺之外一概漠不關心實屬可詫予苦口訓誨置若罔聞嗚呼痛哉無事則安坐而食有事則潛匿畏葸試問我八旗子弟有是理乎然十五日捕賊奮勇仍藉我八旗子弟捨身盡力全數殲擒不患兵之不精但慮諸王大臣不以實心行實政耳誠能勤求

家法率由舊章簡拔俊雄汰裁尪怯務使人人知方有勇能執弓箭刀鎗則處常可壯干城遇事卽成勁旅屏藩旣安福縣志
藝文一
十二
卷之三十一
固烏有殄行驚師之變哉望諸臣皆以實心行實政勤敬公慎顧惜廉恥智者竭其謀勇者盡其力上報

皇天

列聖垂佑之恩下挽愚民流風汚俗佐朕中興之治俱爲盛世之忠良補今時之重咎垂奕代之勲名是予深願也

御製勵志詩

丙辰元旦晨

授璽正君位從古未有

恩渺躬幸身被兢業日不遑勉圖政務治外域沐

考慈新疆久安置內地生齒繁良莠從其類官常多因循
貪得盈胥吏上行下必循愚民半徇利忘害趨污泥邪說
競縱肆引誘惡少年淫蕩罔顧忌百辟疲玩深尸祿皆浮
議所重己身家輕視朝廷事總緣予咎滋念及祇揮淚爲
君固極難爲臣亦不易

列聖厚澤長盡各職勵志

御製因循疲玩論

癸酉之變因循疲玩釀成也詔勅論說幾及百篇硃批奏
摺更不能數計也大旨願內外臣工痛改此四字不存於

安福縣志

藝文一

十三

卷之三十

中銳意任事出處語默動作形容勇決敢爲毫無遲滯漸
進於治矣果能正直辦公任勞任怨以實心行實政國爾
忘家公爾忘私懷保良民懲處邪僻天下未有不治者也
奈畏首畏尾患得患失私念盛而良心蔽重功名而輕朝
廷懈弛存心悠忽度日進思保位退有後言欲望郅治化
民豈非北轅適越乎連歲深感

昊慈直省多豐少歉全河普慶安瀾民情漸稀訟獄此誠

上帝降康下民沐澤之時也予益殷保泰之懷彌切持盈之
念兢兢業業不自滿假庶幾紹我

考志永固丕基然德薄任重總賴內外臣工咸有一德力除四字一德者誠也四字者僞也君臣交接以誠辨論以誠蒞政以誠何患不治乎若奏對以僞談議以僞治理以僞終歸於亂矣治亂之機誠僞所召大可畏也已受此害奚可復蹈耶咨爾百官悉聽朕言有則改之無則加勉爲一代之名臣作皇清之樑棟洗滌積習察吏安民雖有潛伏餘孽焉能漏網若仍前怠玩辜負

天恩綏屢難期又伏隱慝矣盈虛消息之機念茲毋忽也

疏

安福縣志

藝文一

十四

卷之三十

分棚疏

湖廣學政 薄有德

題爲事有裨於學政亟陳管見以昭畫一以廣
皇仁以宏作育事竊臣一介鄙儒識見庸陋荷蒙

皇上簡命湖廣學政任事以來朝夕冰兢深懼不能稱職
每按臨一府矢公矢慎力拔孤寒清除積弊考試之
日凡有關於學政事宜靡不留心體訪冀盡駑駘之
力少報高厚之恩今湖南湖北歲科兩考已竣屆期
報滿所過地方有稍宜酌量務廣

皇仁之處據臣一得之愚縷列數條爲我

皇上陳之其一湖北之安陸府鍾祥縣宜復設教員也

云

云 其一湖南之岳州府宜分棚考試也臣按岳屬據
澧州安鄉縣慈利縣九谿衛永定衛儒學生員劉芳
躅等具呈以岳郡十屬止有四縣屬湖之東生等所
居一州三縣二衛居湖之西地方距府最遠限隔洞
庭大湖八百餘里每逢考試舟船到府不無漂溺之
患查直隸各省考試如兗州西安開封等府屬邑繁
多地方遼濶相去不過三四百里皆分棚考試或分
至三五處不等此皆

安福縣志

藝文一

十五

卷之三十

皇上愛惜士子盤費維艱分設棚署以從衆便較以澧州
六屬距府千里則更濶矣洞庭八百則更險矣情關
軀命則又切矣生等公議捐金於澧州另設考棚伏
懇題明嗣後請照各省考試分棚之例分湖西六屬
於澧州棚廠考校永爲定例不惟輿情久協亦且軀
命獲生等語伏念

皇上如天好生周知民隱海宇內外莫不廣被

皇仁起溝渠而安衽席矣而澧州六屬生童猶以洞庭險
遠動關軀命爲慮臣請援各省分棚之例合六屬生

童嗣後於澧州聽考該知府有刑名錢穀之責東西
各分撥一半如此則

聖恩無遠近之殊而士子免危險之苦矣其一湖南之苗
猺應試各童宜於額外酌入數名以柔遠人也云云

右臣以翰林官奉

旨視學三楚所有見聞理應據實入告錄條陳文教事宜
字多逾格謄黃難盡如果臣言可採伏乞

皇上俯賜全覽勅部議覆施行

直陳湖南利弊疏

吏科
給事 胡爾愷長沙人

安福縣志

藝文一

十六

卷之三十一

臣辦事垣中見吏部覆臣同官梁鉉一疏內稱各省
地方刑名錢穀驛站等項利弊煩多非一時可盡應
勅服官在邸諸臣果有確見應聽晰陳奉有依議之
旨仰見

皇上居高聽卑不遺遐邇凡爲臣子苟有確見何敢隱諱
而不畢陳於

聖明之前臣楚之湖南人也竊見邇來四方未必盡皆無
事而苦者惟楚爲甚湖南更甚自明季兵賊蹂躪殘
毀瓦礫荆榛千里如一青燐白骨所在皆然頃者大

兵屯駐有年在事諸臣方拯溺扶傷之不暇而軍興孔亟休息維艱一切精粗鉅細之物無一不採辦於民間官無論尊卑不分暑雨祈寒率皆胼手胝足則小民竭蹶艱難之狀不問可知然事關軍務官不敢言勞民不敢稱苦其勢然也至於爲有司者上之怵於功令有不敢不奉行之法下之窘於窮黎有勢不能自自之隱姑就近事之切於民瘼者摘陳其概可乎如丈量田地所以清荒熟覈隱匿均甘苦也湖南歷年兵火大率田在草間蓋因人民鮮少牛隻踊

貴糞田不足人力不齊故往日之肥磽者今瘠薄矣往日之廣濶者今狹小矣自丈量之法行則新墾未報者自應照熟科糧但有畝數與弓口不符每丈一畝止得七八分者比比而是夫田之有餘者糧旣議加則不足者糧亦應議減且行文之時弓手算手公正里遞造冊紙張等項使費供應民累已多而丈失之田無除豁之令有賠累之苦則清丈徒以厲民也合無令藩司將各州縣所報魚鱗冊細查丈過田畝數依所定上中下則例照田攤糧務令糧之輕重多

寡與田之升合尺寸符合不爽則荒熟可清隱匿可覈而甘苦可均也如查人丁所以稽戶口防隱占杜包賠也湖南遠不具論自戊子己丑辛卯壬辰異變奇荒相繼接踵止有耗散而鮮生聚邇年奉有查丁之例有司惟務丁多以邀紀薦於舊額之外不妨驟加數千究之照糧科派遂有糧少而丁多者賠累何可勝言合無令藩司仍將各州縣所報人丁冊籍發回各該府廳逐一細查果有新增人丁方准入冊卽照糧編派亦必多寡均平無得參差不齊以致里胥

高下其手徒滋弊端則戶口可稽隱占可防而包賠可杜也至於里遞困憊總因戶重差繁每當輸役之年取辦不可勝算夫差則有長夫短夫背夫擡夫青草夫等項雜辦則有豬羊牛雞鵝鴨以及細瑣難名之物無一不取給焉又衙役革舊換新亦令里遞僉補有每年雇募糧書一名費至二三十金者里遞窮多富少各項安能出辦勢必派花戶津幫故正供有限而雜費無窮此小民之所以重困也請

勅該撫按須嚴行飭禁以後有應公用者有應申詳者

於正項開銷雜項則各官自行設處不得擅取里遞衙役則出示召募勿令里遞僉補仍榜示通衢以杜里胥詐騙花戶之弊庶可蘇困於萬一矣驛遞凋疲臣前疏已陳其概湖南馬少而貴駑駘下乘亦價值三五十金驛遞舊額已屬不敷而差繁甚於往日且其地方遼遠每站有百餘里者差使遇到站之處每每騎馬過站以一馬往返奔馳動至數百里故易至於倒斃又責里遞賠補且差繁馬少則以竹轎代之人力之於馬力相去何啻倍蓰而恤馬酒煙等費亦

索之於人夫嗟嗟窮民何能堪此應行各州縣多買健馬驢騾於舊額之外不妨量爲加增官自雇夫喂養不得委之於民而一切往來差使嚴禁需索恤馬等情至竹轎人夫永遠禁革違者官叅吏拿於以清驛遞而除民累未必不由於此也學校原以儲育人才湖南大亂之後士子曰不聊生何暇治舉子業以故人才寥落從未有甚於今日者且雖奉有釐剔優免之例然猶有許免本身丁徭之文湖南士子未沾此惠久矣或因本身數石之糧與齊民一體應差比

較催徵固所不免有拘押者有羈禁者甚有徑行鞭
笞者夫出入衙門包攬錢糧原有明禁若有應差比
較之役又焉能禁其出入清其包攬乎請

勅提學道臣申飭有司除生員果有逋欠包攬情弊應
遵新定部議究處外其有本身丁徭自應照舊豁免
至於別項不法事宜亦必申詳學道黜革衣頂之後
方許羈禁鞭笞如有不遵許學道詳院題叅亦稍增
士氣於凋殘之後爾以上均丈量覈人丁寬里遞蘇
驛站培學校皆湖南之利弊所關伏乞

安福縣志

藝文一

二十

卷之三十一

天語嚴飭撫按諸臣痛爲釐革所造於遐方非淺鮮矣

奏明被水借賑疏

湖南巡撫 李發甲

楚南巖疆仰賴

聖恩覆育共樂太平自春入夏雨水調勻早中晚田禾栽
插方完滋長茂盛忽於四月至五月等日大雨連綿
川水灌注洞庭辰水直瀉長岳以致岳常澧八縣衛
沿河民居田地被水衝損此八屬田畝窪下濱臨洞
庭並居辰溪下流歷受水患雖由地勢使然實皆臣
不職之咎除據詳批委踏勘果否成災外臣仰體

皇上如天好生之德歲歲蠲租賜賑保民如傷臣身任地方若坐視民饑不救罪何可逃隨於司庫借出俸工銀五千兩分委能員前往被水地方確查實在水淹之家每戶給銀二三錢不等並發倉穀平糶稍資日食此項銀穀統容照數補還彼時理應

題請曷敢擅便祇因民情迫切時不能緩是以推廣

皇上愛惜元元至意急賑窮黎相應據實陳明云云

立法勸懲疏

竊惟致治以安民爲急安民以察吏爲先雖屬常談

安福縣志

藝文一

二十一

卷之三十一

千古莫易我

皇上仁育萬物視民如傷惟恐有司不能奉行澤不下究其於獎廉懲貪宵旰不忘邇者因軍務紛紜旣行權宜復從寬典吏道雜而多端大小相資爲厲科道雖有察訪限於風聞所恃督撫不時叅劾分別淑慝庶自愛者全始全終卽不自愛者亦改途末路元元其有幸也且大計巨典亦恃此議停是封疆大吏不得視叅劾爲緩務而任意瞻徇也明矣臣見近來督撫有半年而叅數員者有經歲不過以一二員塞責者

有立劾方面懲大以警小者有五六年不劾一道府者豈非瞻狗與不瞻狗之大可見者與夫以天下之大所見所聞所傳聞在在有之而叅貪官之寥寥若此豈州縣之貪官真不多見而方面之僅見獨繆正心等二三人耶且臣閱邸報河撫董國興特糾貪庸年老有司五員一疏內云臣因奉

旨賑濟各處饑民經歷郡邑諮詢官評訪得貪劣衰庸州縣等語向使河撫不經歷郡邑此五員或在脫漏之外是留心叅劾者且然况優游坐視其遺留民害又

安福縣志

藝文一

二十二

卷之三十一

何若乎至於明明狗庇轉相漁獵敲骨擊髓民怨莫伸言者痛心聞者髮指

皇上念此伏惟鑒督撫叅劾之重瞻狗遺害之巨立賜睿斷作何立法勸懲雖聖人敦尙寬大不必以擊斷爲功而貪官之害民比於蝗蝻不盡將苗不獲生蟲滋苗稟豈帝王培植國本之深心哉則以叅劾爲督撫之風厲卽以爲督撫之清操而以叅劾有司方面之多寡有無定督撫之優劣斯亦理勢之所必出者矣

請蠲賑疏

湖南巡撫 金廷獻

正賦雖關國用民命實爲邦本湖南自明季癸未年張賊獻忠殘害荼毒殺擄之餘斷手則足慘酷異常繼而羣賊盤踞百姓逃亡田地荒蕪迨順治四年我朝開闢一二子遺方出湯火及三王班師而五年之內大逆一隻虎等糾合賊衆數十股分頭攻犯各府州縣盡爲賊有僅保辰長兩座孤城百姓之存者又死田地之熟者又荒矣六年內親王南征再復凱旋北上賊復乘間猖狂土地人民又遭塗炭及定藩續至提師入粵續順公統兵又來地方雖漸次恢復而皮

骨僅存之民并徵以五六年之荒糧坐撥於王公兩營之兵餉取逼一朝追呼并迫而且解寶解粵船運則苦於灘高水險陸運則疲於背負肩挑脚費倍於正供民苦甚於牛馬_臣目擊心愴亟欲爲民請命緣以前督羅繡錦派撥已定無可如何在小民戴國家厚恩雖甘心輸將勉強轉運猶望時泰年豐不料九年自春徂秋半載不雨泉枯土赤禾苗盡稿且湖南山多田少卽雨暘時若稻穀而外別無他種非比平原之地尙有豆麥菽粟可望今田禾無顆粒之收

千里皆不毛之地民苦饑荒之未已又遭黔逆之鴟
張通省盡被擄掠搜括四野無遺重斂苛征膏髓盡
竭極百姓之苦未有甚於湖南者也我

皇上御極以來頒恩蠲賑不一而足惟是湖南開闢獨後
邀恩不早卽有除荒徵熟之例而五年所報之荒乃
四年以前之荒至於報荒之後又復淪陷則五年所
報之熟者又復成荒而五六年之荒者竟未一報
致令有司按圖而索以一人而當通戶之差以荒田
而作熟田之徵連年逋欠追比難完是以存者又復

安福縣志

藝文一

二十四

卷之三十一

逃去逃者難期再返如長沙知府張宏猷力辦軍需
拮据勞苦猶被指叅者皆因疊年逋負一時並徵民
空財盡有以致之湖南州縣雖皆至苦而長沙一府
尤甚且今大兵南征求牧與芻尙爾艱難卽深山窮
谷間有殘黎牛盡種絕春耕已廢鵠面鳩行救死不
贍尙忍於嚴刑峻法之下問數年之舊欠今歲之新
徵乎若不重加軫恤徒傷元氣愈失人心有土無民
將安用之凡此皆經道府州縣詳報甚確臣尤目擊
最真且寇勢猖獗人爭向背不能不仰懇

洪恩昭宣遐邇將湖南六府二州六七八九年之舊欠盡
行蠲免十年分之新徵查荒徵熟保此目前未死之
殘黎留爲將來輸納之根本萬一

皇恩後時仍照別省災荒之例查明分數再爲覆請竊恐
以日爲歲之民不能待我

皇上如天之覆也

敬陳興利除弊六條疏

御史黃秀巴陵人

臣一介寒士六載詞臣蒙

聖恩高厚拔置臺員適屆七十之年寸心時存忠愛一得

安福縣志

藝文一

二十五

卷之三十

願獻芻蕘敬陳興利除弊六條有關

國計民生所宜實心奉行者敬爲我

皇上陳之

一農桑宜勤勸課也兆民衣食之原非農桑則生養
無具三代時井疆有法授田有制民無田多田少之
事因無甚富甚貧之家雖旱潦見告而凶荒無慮今
土地雖廣生齒日繁遊食者多人心未免狙詐習俗
尤多侈靡富者田連阡陌貧者地鮮立錐爲民牧者
止以催料爲能民生休戚漠不相關求其撫字心勞

者固已鮮矣井田久廢難復限田勢不可行祇有重農厚民一事爲今日亟務_臣懇我

皇上特著爲令凡親民之官必以勤於勸課爲先不得漫云無遊民曠土也惟於每年春秋二時巡行各處鄉村躬親省察令其預備牛種以勤耕作廣植桑麻以獲絲枲收穫米穀不得濫用俱各謹其蓋藏巨室富家不得重利咸周恤其鄰里懲奢侈僭踰之習禁迎神賽會之舉仍俾牧令久於其任實心奉行以三年爲期務使家給人足閭閻實在皆有蓄積荒年可以

安福縣志

藝文一

二十六

卷之三十一

弗虞饑饉凡有司報績必以此列爲首而征歛次之督撫保薦必以此考其成而他務後焉其有勸課不勤儲蓄不充民多窮乏者則爲叅罰所必及如此則勸課勤而衣食足斯禮義自興又何慮俗不漸返於醇良而治難追於古昔也

一考試宜嚴弊竇也

朝廷設歲科兩考取士實屬古今大典自各省盡改學院後學臣俱清白自矢又給養廉之費孰敢仍蹈往轍自貽伊戚但習俗巧僞日滋見學臣廉潔賄賂無

門遂致詭生別計以圖僥倖其中有傳遞文稿之弊有長鎗代考之弊有頂名換卷之弊有連號作文之弊甚有交通內幕閱文濫用圈點之弊有賄託巡捕串同堂官之弊有書役招搖潛通關節之弊有內藏能手作文暗遞童生之弊有撞騙假託欺哄愚人之弊種種不法總由爲學臣者止知清以自持不能明以察奸以致諸弊叢生在素性精明者善爲周防嚴行禁緝有犯必懲人情自知畏懼一遇委靡不振之員縱廢弛以養奸大爲士習文風之害者也大抵一

己之精力有限耳目難周衆人之狡詐無窮欺瞞莫測人惟財利是圖卽子弟且有悖其父兄者況幕客長隨胥吏衙役素多姦猾尤爲貪利無厭者乎此真才所以常致淪落士習所以日益卑污也臣懇

皇上俯允末議勅部議覆載入學政全書

諭令督撫轉行學臣清查諸弊通行嚴禁凡府州縣考試卽責令點名散卷防維代作傳卷諸弊且不得多行濫收送考至院考日細令廩保識認毋得給燭仍認真覆試更弔府縣原卷查對筆跡相符文理皆通然

後取中勿致草索祇完故事倘仍前舞弊或經訪察或有首告卽嚴行重懲搜絕根株其或學臣憤憤在他處發覺者卽將學臣處分如此則諸弊絕而考場清文教可以振興士氣必能不變矣

一蠲賑宜覈實數也我

皇上念切民瘼於雍正五年軫恤湖北湖南被水州縣衛所百姓

特頒恩綸旣蠲正供復發庫帑糴穀備荒如天好生之仁洵無有加於此矣唯是免糧無論貧富而賑濟則專

安福縣志

藝文一

二十八

卷之三十一

爲窮黎富室田多旣免其糧不須再賑惟貧民則日食維艱蠲賑自應兼施但更有一種最苦窮民原無田畝報荒因無姓名在冊臣見外省州縣止憑荒冊花名散賑故豪棍勾通奸胥飾無爲有聚少爲多肆行侵冒而真正窮民反因無田姓名不能上達竟不得少分升合之需忍聽其嗷嗷待哺悉轉爲溝中瘠耶且此弊在各衛所尤甚衛田散處各邑衛糧多屬大戶乃蠲賑仍益富人不逮窮佃其情尤可憫臣請勅部議覆通行各省嗣後凡遇賑濟俱照近京州邑定

例確查無土赤貧之民另造清冊並取具鄰里甘結沿鄉逐戶分結小票一紙照人口之大小多寡以發銀穀勿令豪強吞并吏胥中飽俾現在窮民得自充一日之饑餒比戶皆霑

朝廷之實惠雖有旱乾水溢不足爲斯民大患矣

一水旱宜速勘詳也伏思堯水湯旱雖屬偶歉之行而拯溺救饑必須預籌於人事臣湖南人也知楚爲產米之鄉平原近地農民勤於耕稼雖水旱稍歉亦不致竟成大災惟濱湖者多水傍山者易旱每遇

安福縣志

藝文一

二十九

卷之三十一

大旱大水之年百姓具控號呼而州縣往往顧恤已私置之不理或緣先報年豐後難改詳或謂秋災不爲民病飾詞誑上因而漠視民瘼遂致民情壅於上聞極可痛憾臣思窮民遭逢歉歲目前已乏生計卽稍有薄田食尙不敷糧何由辦不得不棄產謀生流離四出而州縣又從而禁其出境不爲收恤幾何而不爲盜賊也在州縣官動稱報災有例不知例所以防弊耳若實在真荒見聞難掩彼繪圖上陳者甯必問往例耶伏讀

上諭凡地方小有水旱勘不成災例不應題者督撫具摺奏聞令民間情形無絲毫隱匿方不負封疆大臣之任大哉

聖言洞悉民隱軫念民艱肫誠篤摯又如此其至也夫以水旱未及成災者大臣尙不當隱匿豈水旱大爲民患者有司可不速勘詳報乎臣請

申諭督撫嗣後倘遇地方報災卽令州縣速行履畝親勘仍委鄰縣官員確查固宜嚴禁民間捏報尤當重懲官吏隱蔽如果田地無收米穀昂貴亟宜據實詳

安福縣志

藝文一

三十

卷之三十

請或平糶或緩徵賑濟兼施庶不致流離失所如此則民間疾苦皆得仰達宸聰而恩膏無不下逮矣

一命盜宜嚴隱諱也命盜爲民生重務隱諱例嚴處分惟有司以盜犯難於遽獲不嚴加跣緝以事主愚懦無知反多方根究甚有勒取無事甘結以罔下民欺上司者在事主旣苦盜劫又畏官法更慮胥役需索不已往返拖累無休故失盜之家只得隱忍不言盜竊因而愈熾此諱盜所以益多盜也人命重情報

官則州縣往驗者多通詳者少彼見苦主柔愚或恐嚇以危言又或安慰以甘語甚至豪棍通同行賄諭令私和屍親不忍檢傷情愿自息以致強梁者逞一時之忿弱肉強食毫無忌憚此諱命所以多命案也

臣請嗣後民間有命盜案件若已報而不行深究毋論得贓與否州縣皆宜重懲其有情真事實官民交隱或經上司密訪細查亦許旁人據實出首一經發覺官則飛章叅處吏卽監禁定罪豪棍則立拿重懲務使真盜必獲真命必究不使盜風滋熾人命草菅

斯可以稱安民也至於假命圖賴以詐索財物買盜扳贓以誣讎良善者其立法嚴懲又當加等可知矣在命盜原有限期未便率結然果不得其情自必虛衷察訪屢加研訊若情真罪當毫髮無疑則初招已定卽合出具不致改供甘結附卷具詳其間亦有鄰右干証與無辜牽連或老弱貧病難隨招解者卽取具的保聽候院司審結釋放庶愚民旣鮮拖累之苦而命盜自無沉擱之患矣

一隄工宜嚴浮冒也楚爲澤國惟恃隄防以禦水患

而安民生現蒙

聖恩特發帑銀六萬兩分撥湖北湖南修築隄塍並疏濬支河淺阻此非常之曠典也臣查各處隄垸每歲何嘗不修俱照糧石以派夫工向令工無虛冒隄皆堅固卽稍有雨水亦何至卽行漫決惟從前官役每多侵漁入己衿棍豪強率皆免富差貧隄總單頭又復徇私包攬至僱夫必扣減工價報銷又多開數目此浮冒所以滋弊多端也且鋤隄土則翻新蓋舊而隄面愈削築隄脚則上緊下鬆而隄根易塌苟且塞責

安福縣志

藝文一

三十二

卷之三十一

於一時必難經久於日後此夫工所由難覈實數也故隄工一事在小民常苦力役而官吏反樂興修以朝廷利民之舉竟爲奸猾肥己之計可勝嘆哉且修舊隄與築新隄形勢不同工程亦異凡隄有衝潰處或補築決口或另築月隄費用旣繁創建匪易若舊隄原塿現在止宜擇緊要險處與低薄處加高幫厚其夫工遠異於新築未可任其朦混開載概以數千百丈之長數十百里之遠一例浮捏虛數欺上司以侵國帑也今湖北各屬隄里甚長支河甚多修濬自應

兼行楚南州縣逼近湖濱者波濤湍激多山水迅發無從疏濬惟修築隄圍爲要着敢請

勅諭督撫委員清勘時載清土名實從某處起某處止隄脚若干寬隄身若干高隄面若干厚細查土方新舊估計夫工多寡造冊報司計土論工按數發銀照舊例每夫日給米一升鹽菜銀一分卽於修築之舉兼寓救荒之策嚴革前此積弊庶克副

皇上愛養楚民至意自屬一勞永逸之良謨然監修尤當差委賢能之員不得徒用佐貳致與胥役衿棍勾通

舞弊欲知隄高厚則插竿壘土以測尺寸欲測隄堅鬆則錐土盛水以試疎密欲知夫工數目則點土方大小查新坑深淺以辨多寡虛實工竣又委道員親身嚴查凡丈尺土工俱與原冊相符送部覈查方准開銷而考課工程尤須勸懲有法查黃河修築隄岸俱以三年爲限如限內潰決卽令承修官賠補迨限滿隄堅保固無虞查明議叙今湖南隄工因例無處分州縣不獨視爲利藪且謂功過無與己事一味草率以致隄塍不堅故湖南百姓歲歲受隄工之累者

此也查康熙五十五年工部原議及此唯是歲久玩
生伏乞嚴

勅督撫實力稽查分別懲勸則功過旣明而隄工自歷
久常固斯民可以永慶安瀾矣

積貯議附

黃 秀

稼穡乃王政本務積貯爲生民大命從古皆已行之
如周官遺人掌邦之委積以待施惠鄉里縣都之委
積以卹艱阨而備凶荒立法極爲詳盡而王制三年
耕有一年之食九年耕有三年之餘是藏富恒在民

安福縣志

藝文一

三十四

卷之三十一

歛蓄不盡在官也後代有平糶和糶均輸市易之法
制每不一而愚謂在官者莫過於常平在民者尤宜
於社倉兼舉而善用之其預備必有道務令豐穰先
時而足其轉移必有方務令侵漁罔滋其弊且給散
尤有法務令窮民獲霑升斗之需至於管理尤宜得
人毋盡專制於官吏亦勿概及於閭閻斯所積所貯
者行諸一方尤宜遍及天下行諸一時即可永垂千
古矣

國家休養生息已閱數十餘年

先帝臨御最久深仁厚澤入人至深頻蠲正供以裕民財時發倉廩以濟民生截漕米於東南減糶價於州邑嘉惠元元既有加而無已我

皇上踐阼之初惓惓以民依爲念賑京畿之窮黎豁江蘇之積逋兩湖水偶汎溢則發帑金以修隄防寓賑饑於畚築之中而水不爲災閩粵歲稍有歉則買米稻以備旱荒多轉運於鄰近之省而民不乏食救荒善政洵屬超越前古矣然賑卹於臨時尤宜綢繆於平日則議及積貯誠今日急務也試言豫備之道常平

安福縣志

藝文一

三十五

卷之三十一

一法昉於隋之耿壽昌行於唐之長孫平由來已久無如州縣奉行者止視爲故事始或勸捐於紳士里民繼或買補於城邑鎮市保無有勉強抑勒俾小民多賠累之苦者乎惟當有年之時捐輸皆出自誠然不致強派以所難買補則因乎時值不得抑多以爲少而穀納於倉又毋使奸胥高下其手家丁苛索陋規則裕於豐亨者自可發於饑饉而儲蓄爲已豫其轉移維何穀旣多積則陳陳相因自宜出陳以易新乃有司每多虧折吏役復加侵食而豪強且爲兼并

卽有盤查之例分賠之法往往彼此蒙蔽互相瞞隱或捏爲民欠以報或僞爲霉爛以聞而倉廩悉屬空虛誠盡革積弊俾官不敢肆欺吏不敢侵漁盤查必覈其實不循虛文受賄賂以欺

國而蠹民則取陳以食農生新以足用而轉輸自可勿匱至於歲遇荒歉或減價以賤糶必令遠近窮民得受一分之賜毋使商賈囤多計圖生息或煮粥以活衆必使真正孤貧得飽口腹之需毋令老弱饑餒益增疾苦且議賑議蠲不得加戶口之數目改升合爲

石斗而豪強借貸者必取償吏胥減扣者必加罰庶給發不致留難而中飽侵蝕之患蓋亦鮮矣至若管理何以得人也如義倉設在城邑者既有定所而社倉雖可佐常平所未逮然朱子猶謂里社不皆可任之人豈良法必資夫美意歟今誠於鄉村鎮市皆立社倉每處積穀數百石擇殷實醇良之民三四人總理其事則民與民相通易彼必知某也貧宜用賑某也良宜用貸某也男婦若干須計口而授按名而與之豐則收入於倉荒則散出於衆有司年終查覈其

多寡稽察其虛實倘有細民逋負者則責之總理之人總理有侵漁者有司務稽查得實繩之以峻法速令其補賠不得少爲寬假焉如或有司借端擾民假公濟私則府道必覈實申詳藩司卽指名揭報督撫訪查隨以糾參加之庶諸弊不致叢生而小民均霑實惠積貯之法自可行於遠歷諸久而不弊矣所謂有治人而後有治法者此也不然者徒循其名不責其實則法立弊生安能俾愛養斯民之善政下逮於窮簷而嗷嗷待哺之百姓胥沐救荒之良法美意於

安福縣志

藝文一

三十七

卷之三十一

無窮也哉

檄

申飭捏報墾荒檄

湖南巡撫 盧 震

湖南地方盡屬兵火遺黎滿目荒殘實難遽成熟畝惟是在先勸墾有行因生捏墾之弊無墾旣稱有墾於是荒糧混作熟糧令民按數賠納嗣後包賠力竭漸至逃亡其實熟田並成荒畝是則因病生病致令現在窮民千辛萬苦歲額有欠敲扑難堪某自涖任以來卽洞悉此害通行察訪後據彙詳逐將捏墾逃

荒情節分爲二疏先後爲民請命復奉

俞允親行踏勘減從賚糧冒雪種寒涉川履險馳驅深
箐密篔之中寢食風雪曠野之地所過郊原惟見敝
廬星散民無全衣遇此號苦聞則酸鼻回長繕疏具
題幸荷

深仁浩蕩如其所請已將原造丁糧概賜豁免在殘民
將起白骨之肉在荒邑始有席煖之官則民之未去
者宜無去念未來者應動歸心但思各州縣從前捏
墾逃荒兩項其間已賠錢糧有按畝照糧攤派者抑

或有不按畝數惟照糧加派者正須各印官熟察各
自加派包賠之情事要知當日作何加派者仍宜作
何減除况各數多寡真僞更應喚集里長冊書經承
舊役並地方年老正人通查一切新舊圖籍從公細
講清算如先有加今必加減倘有豪強先年未派包
荒之數自應實減包荒之民不許移甲就乙不許偏
輕偏重縣官吏卽將單開豁免數目務期矢公矢慎
詳加覈算某某係捏墾錢糧應除某某係逃荒丁賦
應減定要減除民間實賠錢糧毋容奸猾飛詭本身

正賦纖毫皆歸至當不許少有不公算明減除數目
逐一覈實造冊取具里民甘結該縣印結由司總覈
報院以憑稽察如該縣受賄徇私庸闇不明但委經
承書算通同豪強作弊多寡任其增減致使賠賦者
向隅徒悲反致不賠者私那正賦或經訪實或經告
發一切蠹役豪強登時拿問俱置重法仍將該縣飛
章叅奏從重究辦決不姑貸

除湖南三大積弊檄

湖南一帶郡縣罹數十年之兵火見在所有子遺皆

九死一生僅存皮骨之殘黎耳今當軍需浩繁供應
維艱之際宜何如愛養以滋生計乃近來徵收無度
差役濫溢攫取之術指不勝屈如供兵也穀草有買
價運送有腳價雖爲數臣十百萬俱見發庫銀或抵
免當年大糧並無絲毫賒欠而小民擔負不憚八口
之饑及問領價值層層剝削百不及一收受之□□
爛陳朽頓如山積又不止巨十百萬之銷算也□陰
折陽折兵折民折出入反覆又不啻數十倍供兵何
事湖南何地孰非膏血而忍心一至此耶其苦一也

如郵務一事百十里一站夫不上二百名馬不下二百匹計一郡縣有三四驛者歲額工料以萬餘計爲數不爲不多一遇大差銀鞘張皇無措或僱覓營馬或飛拿里甲總以工料協濟不前爲數不足爲口實而其實馬騾夫役無足額者

朝廷所設萬餘金錢置之何地又有一等巧取之徒遇差挾借庫銀差去私派幫貼而所派之數又倍溢所借之數互飽穢腹兩害公私忍心害理貽禍已極在窮簷編戶以父母之驅子弟而又係公家急務敢不

應承徒有含冤於心而爲之長吁三歎耳其苦一也至徵收錢糧業有一定由單自經投櫃之後流水底簿不復再見天日此外或幫或貼或補庫或銷算或造冊或紙張或打發催差或拘算年總血盡毛枯爲費何啻正項數倍其苦一也以上三大積弊道路之謠都門之口嘖嘖有言雖欲代爲容隱不可得也撫屬官吏嗣後各宜痛革前弊大家共發仁心公門之中好行方便與百姓實除三大積弊如領過供應價值當卽時找補抵兌見年大糧必實心銷算浥爛陳

朽作何抵補驛遞夫馬必實足額數工料錢糧按時支發勿得閉門張皇沉擱餉鞘再累里甲徵收大糧各照由單而額外私歛盡行痛革期於實心共理以保殘喘儻怙終不悛或經訪聞或經告發官則飛章叅奏吏則大法處死身名俱敗悔何及焉

禁漕糧陋規檄

巡湖南 趙申喬

漕糧上供

天庾輸納原有定數因江湖道險飛輓維艱交倉兌運費用非一不得已而議幫銀幫米總爲漕務濟其窮

安福縣志

藝文一

四十一

卷之三十一

非欲蠹胥享其利也湖南漕糧陋例上下通同官役分蝕任意攤派羣聚烹分小民脂膏腴削已盡上年酌減耗費似已清釐而民雖照議量減實則暗地增加有僉派里民包收包解者有違例折銀多勒重價者有借端開銷以少冒多者更有私行賄賂以有諱無者大約所幫銀米費於漕糧者六七費於官役者二三種種蠶食全無忌憚而更可怪者糧道衙門乃係董漕專司卽爲侵漕弊藪其經承則漕糧房有費派撥房有費篩颺房有費樣米房有費批迴房有費

號房有費典承有費差役則管事差有費提糧差有費趕幫差有費查縣納糧差有費押兌差有費三班有費斗級茶房有費有索米索銀數石數兩以及數十石百餘兩不等此一絲一粒何一不從派幫而來以派幫所出而飽此輩之腹窮民飲憾而不能言下屬畏威而不敢言漕弊之多先自糧道衙門始漕政之壞亦先自糧道衙門始又安望其飭禁州縣革除錮弊也今當新漕兌運將屆恐或怙終不改如有指稱漕糧派撥篩颺樣米批迴號房典承以及管事提

漕趕幫查米押兌三班斗級等名目不遵法紀不顧身命需索陋規指勒漕費者據實首告立即鎖拿杖斃並將該道以縱蠹殃民糾叅如敢通同徇隱察出一體治罪

飭減糶救荒檄

州縣存貯倉穀有春借秋還之例原使實在窮民借領運回庶贍八口以資東作長衡二屬上年雨澤愆期收成歉薄况下江時多搬運以致本地存積甚少且富豪之家擁穀堆積坐待長價更爲喪心不良近

日市米騰貴窮民度日維艱聞之食不下咽夫春間原有出借之例有司若能實心檢實自使饑民得沾實惠今聞各州縣劣衿棍蠹乘出借倉穀或捏名冒領或借索行私無告窮黎莫不向隅而地方官惟憑奸猾侵蝕毫無顧忌是出借之名甚美而其實無益是與其循例出借徒飽棍蠹之囊橐莫若減價糶賣以救窮民之饑餓也長衡二府屬上年出借穀石秋成未經還倉之州縣舊穀既尙逋欠今年難准再借應以現在一半應借之穀值此青黃不接減價糶賣

實在窮民如或不足再將應存一半內減糶十分之六七州縣不得假手家丁胥役致滋混冒及需索短措使窮民裹足不前其上年秋成已經還倉之州縣應仍照例一半出借一半存倉備賑至減糶之弊亦不一端或虛報糶數賺利肥囊或縱容奸商地棍多買轉販貧窶小戶反不得升斗充饑殊堪痛憾不知地方設立有司所司何事覩此瑩瑩赤子不爲竭力軫恤更以

朝廷救災之倉穀攘爲貪污分潤之機緣此等不肖雖

存皮肉全無心肝卽上司耳目有所不及一時法網或倖得免而天理難逃必遭絕滅子孫之禍救急如救焚不得不痛切言之其轉行嚴加申飭各存一分真心行一分實事毋謂紙上空言不以白簡從事甘被若輩之欺朦也其減賣價銀令各州縣同同城武弁教官佐貳首領封明貯庫取結報查不必轉解致滋往返如有侵虧卽將出結各官一並叅究仍將糶過穀數銀數報明俟秋成飭照時價買補或價有贏餘並買穀入倉備賑總期私弊盡絕窮餓稍甦不勝

安福縣志

藝文一

四十四

卷之三十一

爲賢守令望之各宜三思祇遵共畏王法冥誅毋得負人適以自悞也

通飭教官檄

湖南巡撫前湖南學政雲南景東廳進士 劉

崑蘊齋

爲通飭知照事案據石門學教諭蔡用錫稟稱竊今年六月內奉前制憲張鋁板印札開據善化縣知縣胡鏞稟請通飭各屬教官將文武生員姓名年貌及入學年分按季造冊移送州縣遇有應行詳請斥革之事地方官卽可按冊而稽立時詳辦免致移取年貌轉多周折俾州縣有隨時詳革之權等因到學奉

此卑職微員自應遵辦且再三捧讀知亦爲整飭十
習起見誠恐教官庇徇生員致州縣事多掣肘耳惟
思士習與民風相關士氣尤國脉所係而培氣節則
先在養廉恥故孔子云行己有恥可謂士矣孟子云
恥之於人大矣今按學政全書開載順治十年題准
生員犯小事者府州縣行教官懲責犯大事者申學
臣黜革然後定罪如地方官擅責生員該學臣糾叅
康熙九年題准生員關係取士大典者有司照民例
扑責非

安福縣志

藝文一

四十五

卷之三十一

朝廷恤士之意今後如果有欠糧重情地方官先報學
院學道俟黜革後治以應得之罪若詞訟小罪發該
學責懲乾隆九年議准生員所犯有應戒飭者地方
官會同教官將事由具詳學臣酌斷批准然後照例
在於 明倫堂扑責如有不行申詳學臣不會同教
官而任意叱呵擅自飭責者聽學臣查叅以遠例處
分仰見我

朝樂育人材簡儒臣以錄取之付學官以訓迪之待之
甚優不與齊民等俾文武生員知

朝廷愛恤之意益不肯自輕如有自虧行止卽當內問
懷慚洪惟

列祖

列宗探造士之本源養羞惡正所以培氣節也今一旦付之
有司而以齊民待之則生員亦將以不肖自待謂身
不足重名不足榮勢必無恥之徒日衆於育士奚益
哉或者以粵匪犯楚而從匪者有已革之生員致患
生員滋事故有此舉然從匪之齊民不下數萬又誰
縱之使然豈地方官不善約束齊民而獨善於約束

安福縣志

藝文一

四十六

卷之三十一

生員乎麋爛至此我

皇上宵旰焦勞急欲畫安民之策出戡亂之謀而守土者徒
察察焉指摘生員是務甚恐士習未端士心先寒已
夫士爲四民之首亦卽百官之階竊觀古今來膺顯
秩者往往承平無事工粉飾以養癰視苞苴以計吏
不幸而城郭憑陵則坐失事機苟全性命種種誤國
之爲皆由廉恥盡喪故氣節不伸而吏治因之不振
讀史者所爲浩嘆也我

朝收多士報禮之重其公忠體國者卓有可傳誠以

聖聖相承其所以育才養士法良意美也今造冊付之州縣則必將

祖宗成憲更改似非臣下所敢出卽恐教官多不肖庇徇生員不得已爲救時之計又安必州縣之皆賢乎雖札中言教官無教澤及人州縣不以培養人才爲念誠哉是言然第以造冊牒縣辦理將來杜教官之庇徇而橫肆或在州縣煅煉之周內之萬一生員膚愬教官爲之理寃必至州縣與教官不和彼此互相攻擊無論有乖大體而古來黨人風氣由此而開其禍有

不可勝言者或竟將教官裁去概歸州縣筦理尙歸畫一然而更張已甚也且州縣錢糧支放每至年終教官必爲州縣出具清楚甘結而教官未嘗請飭州縣造具錢糧支放清冊付學稽查而州縣獨索生員清冊似屬偏枯至州縣與教官近在同城朝夕相見有事可以相商又何周折之有卑職拘守成例以爲生員清冊造賚憲臺以備查核兼爲廩增歲貢資序對核新中舉人親供實大人取士之需非有司用法之具若以進賢大典造存地方衙門體統攸關不可

不慎况按季造册即可移送縣官將來各憲衙門亦或札飭照辦則教官書識不過一二人即竭終年日夜之力亦恐不及卑職迂愚不達時務計惟申明舊例飭教官各發天良實心訓士不可奉行故事辜負官方至於造册牒縣據例酌情似多窒礙理合縷陳愚見伏乞作主士林幸甚等因據此除批示據稟已悉候咨商督部堂撫部院另札飭遵此繳正稟存外合行通飭爲此札仰該學一體知照此札咸豐三年

禁錢漕積弊諭

湖南布政司督理糧儲道李

安福縣志

藝文一

四十八

卷之三十一

照得錢糧絲毫爲重在官爲

朝廷帑項在民皆閭閻脂膏徵收歷有章程不容舞弊查各屬徵收並不遵例設櫃大堂聽民自封投櫃大半由蠹書包徵包解甚至擅出墨券私相授受截串在家小民偶爾遲延欲求給串有費十數倍而尙不可得者稍不遂慾稟官拖押丁役從而索擾殊堪痛憾現奉撫憲嚴禁並訪拏究辦除札飭各屬遵將徵收章程勒石外合亟示諭爲此示仰閭屬官吏軍民糧戶人等一體知悉嗣後徵收錢漕遵例俱用板串

設櫃大堂地方遼濶者酌量適中處立一鄉櫃聽民
自完或錢或銀照時價折算不許書役包攬亦不准
以秤色藉端苛索勒添零尾一經完納立即截串不
准稍延該未完之戶亦即急公自愛踴躍輸將毋得
觀望遷延自貽伊戚總在地方官以次查明鄉里隨
時傳催所有現在徵收章程仰即勒碑大堂之旁照
摹賚呈查覈其有仍以墨券撞騙並率稱串票填完
多方苛索許即扭送稟官從嚴究辦倘再陽奉陰違
仍循故轍並不實力遵行一經訪聞或被告發本司

安福縣志

藝文一

四十九

卷之三十一

執法如山定即從嚴治罪不貸

伐蛟諭

節錄

湖南糧儲道原任岳陽人

王葆生

初田

諭各屬伐蛟除害以全民命事按蛟出多在夏末秋
初故月令伐蛟命於季夏所有伐之之法詳載陳文
恭公集中辨土色矚光氣聽聲音鎮之不一而
足其地迹冬雪不存夏苗不長土色之赤可辨也其
地氣朝黃暮黑夜有黑氣上冲此乃雉與蛇交精淪
於地雷鳴則入地成卵下達於泉積數十年聞雷聲
則自泉間漸起而上色氣漸明可矚也其未起以前

遠聞似蟬鳴或如醉人聲此時能動不能飛及漸上距地面三尺許不過數日候雷雨卽出則聲響漸大可聽也善識者先於冬時視其地無雪無草復於春夏之交察明色氣掘至三五尺得其卵大如二斛甕者預以穢物污之多備利刃剖之其害遂絕又蛟畏金鼓及火山中久雨夜立高竿掛一燈可以辟蛟夏月田間作金鼓聲以督農則蛟不起卽起而作波但疊鼓鳴鉦多發火光水勢必退此鎮之驅之儼若六師之攻伐也今且節錄其說刊發各屬仿照通行有

安福縣志

藝文一

五十

卷之三十

能驅蛟報官者檄地方官給賞以示獎勵惟是伐之時必邀同保甲團長踏勘眼同掘伐不得傷廬墓毀場圃有干法紀是在士紳細爲村民講解共圖除此大害也特諭

諭士民四條

邑知縣江西清江進士 王宏謨

照得本縣履任半載於茲聽斷之餘旁採風俗審知訟有數端亟思更始顧醫者雖善於切脈不如善衛生者之疾自不染也訟之彖辭曰訟不可長大象曰君子以作事謀始夫能謹之於始則訟端可杜而訟

累可祛爰列四條其各懍遵毋忽

一婚媾宜用禮書古者二姓合好必須六禮俱全所以正人倫之始也年來有關名節之案每研訊確情隨時究結然尚有殷殷爲爾等開示者夫室家不足因來雀鼠之爭文定厥祥式衍睢麟之慶三代民風古樸尙且以禮相要以文爲定抑亦禮在則然今點燈發喜相習成風過采傳庚僅憑片楮一經涉訟則媒証賢愚不等草庚真僞難分事隔多年半參疑信貧居獨戶絕少往還各執一詞毫無確據迨經抉摘

奸謀而受累已甚獨不思平日買賣田宅猶書契約一毫不苟何獨至婚媾大禮任意模糊是視兒女之終身不如錢財之細故也興言及此良用慨然嗣後結媾務宜豫買禮書兩封到發喜時或行聘日衍成莊啟前用敵體稱呼帶叙兒女之行第中寫三代履歷並陳本人之年庚繼列禮儀後詳年月先寫一封合諸未寫者並交媒妁送之女家卽日女家留一回一如此鄭重有禮儀可質有年月可稽卽兒女亦知繫屬已定心志貞一彼背義者烏能翻悔作僞者豈

能盡同蓋不知斬盡許多葛藤而絲蘿永固矣
一廉恥實四維之綱夫婦乃五倫之一所以聖人作
易夫婦之道期諸恒久家人一卦獨利女貞貞卽廉
恥之謂也今人莫不願得貞婦婦亦莫不願言偕老
永無蹇難之虞然而中道棄捐往往而是者其故安
在一由翁姑之寡恩也一由父母之溺愛也一由男
女之無情義也夫女子舍其父母而父母人之父母
爲翁姑者望其生男育女養老送終子或不常在家
勞苦藉其代替憂思藉其解釋疾病疴癢藉其扶持

俗語云子賢不如媳婦賢正謂此也今鄙吝之家一
切拾薪挑菜皆使婦女上前役同廝養歲值稍歉則
縱令四外尋取菜苗沿門乞食百十成羣不可斥逐
抑獨何心更有中等門戶衣食儘可自給亦驅令婦
女沿門圖接勺米杯羹罔顧拋頭露面此則雞鶩相
逐馬牛其風所得幾何而廉恥已不可問矣至於婦
人在家從父出嫁從夫古者旣嫁而歸兄弟不與同
席所以別嫌疑也今養女者平日漫無教訓或夫妻
反目姑婦勃谿輒復出頭護短接女回家甚且任聽

蕩踰希圖離異此亦由翁姑夫男刻薄寡恩所致獨
奈何爲父母者亦甘心使其女爲道旁之花移枝之
鵲而不惜也夫婦之不終豈非娘媿兩家釀成之與
又其甚者淫潑婦人背夫逃走薄情男子輕賣髮妻
甚至事後指控奸情希圖詐索人之無良亦何澆薄
至此夫古人蒸梨出妻蒸梨小事何至出妻蓋予之
以可受之名所謂君子交絕不出惡聲也今已恩斷
義絕矣而又捏曖昧之情使其蒙惡名以去忍乎不
忍言念及之殊堪痛憾誠使爲翁姑者待媳婦如女

兒爲父母者待女兒如媳婦爲夫男者知糟糠之妻
不下堂彼女子者以身事人又豈不樂愛惜廉恥爲
自己顧名節耶試觀二南之化江漢亦有遊女七月
之詩婦子相率農桑桓少君提甕出汲孟德曜椎髻
賃舂冀妻饁餉羅敷采桑何嘗非田婦村女載在簡
編揚芬彤管爾等亦聞而慕之矣安福接壤江漢有
豳俗之遺衣食素饒易興禮義本縣樂觀美俗之成
而與爾等相安於無事者於是乎在

一墳塚宜明碑誌也自來死士之壠固禁採樵而有

王之墳豈宜冒認今習俗捏誣影射或指土堆爲邛墓或捏平地爲毀戕或本無碑誌率控扛抬或私造譜關妄思朦混或陰基豫立計爲穩奪之根或討葬有真輒起侵凌之見人鬼側目良懦寒心究竟實因墳山起釁者少不過訟師尋一迷離不可捉搦之題希圖拖累嚇詐而已不知墳前之翁仲無言而四鄰之耳目豈能盡掩紙上之黎邛雖幻而公堂之摘發斷無可朦一經審實三尺無私本縣志切愛民力期弭訟豈容此等鬼蜮之徒倖逃法網擾害地方惟是

愚民任聽教唆雖屬罪有應得情殊可憫爲此復行曉諭爾等各有天良試思先人體魄所藏自當堅固培封明白標識掛掃以時何得諉諸蔓草荒煙致使代遠年湮茫無確據卽此荒唐已爲不孝若更爲覬覦片壤起見妄認祖父假冒兒孫此又寡廉鮮恥之甚者也彼塚中人有知不且啞然自笑乎昔郭崇韜泣拜汾陽之墓至今傳爲笑柄狄武襄不肯自附爲狄梁公後識者高之今卽不能如古之英雄豪傑志節錚錚奈何見利忘本爲祖宗者亦何賴有此子孫

耶至於恃強佔葬尤爲不合孝子以禮事親強葬禮於何有且陷父母以不義也況逞忿尋仇尤多意外之慮泉壤有知豈能瞑目凡此昧心虧己之事縱逃國法亦必終罹冥誅至於被害之家大抵因愛惜小費所致查控爭墳山原無碑誌者居多如有文契可憑尙可勘量否則塊然一坏從何辨別嗣後喪葬務將死者姓名生歿年月塋山向址子孫名氏刊刻碑文又用尺許小石照刊一通埋於墳前用土覆蓋上壓以碑此卽所謂壙誌乃古禮也如此周詳可杜冒認

混爭之弊豈獨自己免累抑亦互相保全之良法也一主佃宜務平均古者八家同井通力合作計畝均收親睦之風釀成太和尙矣後世田准民間轉售而貧富相耀然富民有田不能自耕貧民無田而代富民耕田或田賣而仍稞栽是貧富皆有田也安福土宜稼穡又無水患籍斯土者富積穀爲業貧耕種營生不必遠貿江湖頗稱沃土顧其中安居樂業者固多而藉端訛蠱者亦復不少夫富民買田招佃斗種歲取石租貧民五口之家佃田貳石中熟之年俯仰

足以自給又無追呼之擾較富人轉覺使宜何苦瘠人肥己妄肆橫蠻輕罹法網就使詐得錢文而東鄰受害西舍寒心誰肯輕相招納勢必至無田可佃使父母妻子流離失所損人適以害己焉至於絕賣之業不准找贖例有明文乃或以丟糧瞞丈爲題飾詞圖索此必盡法懲治嚴究主使毋稍姑息然所深望者尤在爾富民富人者貧人之母有可以爲善之具乃每聞故穀者春借秋還竟至加五起息是比交租更重也夫粒米汗珠果真情切通融何又如此盤剝

安福縣志

藝文一

五十六

卷之三十一

况重利必不能償徒資藉口與其涉訟而花費愈多何如薄收而索償亦易至佃戶中勤儉力作之人不幸有疾病死喪等事亦當稍從寬假昔人謂少收幾斛多收幾年又云能與貧人共年穀自有明月生蚌胎此語誠可尋味本縣以貧民本有衣食之路卻被自己堵塞富人有田而反爲田所累故不惜反覆曉諭誠思此言則貧富相安而彼此受福矣

捕蝗諭

咸豐八年

邑知縣荆州駐防蒙古正白旗舉人

玉

兩峯

照得上年秋收後飛蝗過境必於土堅處以尾鑽土

遺蟪始如蜂窩漸泯形迹須急查辦其初遺如麥門冬而小相連數粒久則每粒各成九十九子夏秋入地十數日而生秋冬之交不得大雪凍壞次年春夏尤多滋蔓舊經示諭搜挖並設局城鄉收買其勢甚便誠要務也茲際夏初查得搜挖未盡之處初生微細如蟻色黑蠕動依草根團聚成片大如掌或如扇三數日內躍不甚遠以足蹴之則驚散乘其復聚再蹴之可無噍類捕之之法民夫各編竹枝爲巨帚每里設大旗一枝鑼一面每甲設小旗一枝地方執鑼

甲長執小旗各甲民夫隨小旗小旗隨大旗大旗隨鑼東莊人東立西莊人西立各聽傳鑼一聲卽執竹帚東西迴轉隨在撲之夜燃草薪置其旁皆相逐投入或地多畜鴨亦卽驅而食之鴨羣數百入稻畦中小蝗立盡亦江南治初生蝗之一法也其蝗生已逾七日者每求食逐隊自北趨南且行且食則宜相其地勢與蝗至多寡之勢挖溝圍之或接挖長溝堵之寬丈餘深二三尺勢須陡峻光滑令跌入者勿得緣上溝間逾丈挖一深坑稍遠再挖巨坑皆派人守蝗

至稍緩卽於溝北驅以巨帚蝗湧至如潮頃刻皆滿
踰溝如履平地急驅入坑覆以土更挖大小溝以待
夜置火溝坑中亦能引蝗投入此捕漸長之蝗又一
法也至於蝗生二十一日翼成能飛每視禾稼芻薪
豐茂處載飛載止亦自北而南爲害尤烈其捕法或
以其性畏金鼓畏鎗爆待其將至而發則懼不敢下
隴頭多置旗幟或以紙爲之亦畏不敢下又或以蝗
性畏油入口卽死小戶田少但取油和水灑諸禾葉
而蝗輒飛去者有之尤妙在每日晨露未乾以及日

午戀合日暮停聚之時旋驅旋起飛不能遠就而撲
之夜更置炬隴畔俟其投入集而殲之用力少而成
功多晝夜兼施尅期淨盡現奉 守憲札委儒學暨
典史各官督紳分途查辦合再示諭爲此示仰閭邑
紳耆保甲農業人等速製一切器具遇有蝗處立即
添派民夫如法撲捕其無蝗之區亦宜出夫助捕鄰
境免致飛入爲災總以合一區之力捕一區之蝗而
無蝗之區均有禦蝗之備所有器具民夫用費或東
佃各半或四六分攤均聽其便倘或推諉吝不出夫

許該紳保隨地稟請委員查究至鄉間隄垸墳墓或恐掘挖驚擾者准其自行捕捉亦應分定段落稟請委員驗明責成辦理如稍因循卽惟該紳富是問該紳富果能出資實力搜捕由委員查明分別彙詳以資獎勵其上年所設收買蝻局不論男婦老幼仍可撲打送局該局紳視其多少酌量給價再一鄉村落有無蝗蝻保甲無不周知務須預報敢有諱匿以及遲誤者定行究辦不貸

禁書役索詐檄

湖南巡撫江蘇陽湖進士 惲世臨次山

安福縣志

藝文一

五十九

卷之三十一

照得州縣爲民父母興利除弊政固多端而稽察書役假威詐索滋擾良善尤爲要務湖南州縣衙役無忌久所著名蓋緣民風好訟偶因雀角細故卽便架詞控告一經批准卽爲書差之利階始則代書索蓋戳記錢家丁索傳紙費迨詞發房書吏索抄詞費出票錢票入差手則索起發路費及盤費各錢公然乘輿下鄉科派尤甚稍拂其慾執持鐵鍊恐嚇繼則索送牌費並索原被告酒席豐則喜薄則斥猶是索差費名曰盤子錢稍不遂意拖累原被在寓守候經年

累月典當殆盡求審不得求結不能勒至書差各費
交清始能帶訊則索檢卷費值堂費散班聽刑各費
審結後則有具結費其費自十千或數十千百餘千
不等每因一案而少有之戶業已傾家蕩產矣種種
情弊實由州縣怠於公事所致深堪痛憾前經本部
院頒發清釐詞訟冊式通飭各州縣按月造報已結
若干未結若干新收若干開除若干雖據遵札造賚
一月內訊結不過二三起未結者尤多推原其故或
因差役詐索遂意包不赴案或因詐索未成羈延時

日衙蠹害民情僞百出言之實堪痛憾本部院不忍
不教而誅合再出示曉諭爲此示仰閭屬官吏丁役
人等知悉凡爾牧令務當振刷精神力求整頓嗣後
自理詞訟原告兩個月不投到聽審者照例註銷被
告具訴卽取具的保候審或情跡近於刁狡者交差
看管立傳原告訊結不得久羈守候各於大堂安設
木櫃一個蓋用木格以便投紙專收原被告投到稟
詞加以鎖鑰該牧令每晚親自啟視卽知某案原被
已齊牌示傳審可杜書差隔閔勒索之弊其有應行

票差非命盜姦拐重大案情一票止准一差票內蓋用不准乘輿字樣圖記限日拘傳到案示審倘該差逾限卽與嚴比如敢乘轎勒索許原被之家協同保甲將差役轎夫指名稟究該牧令毋得徇庇如有應勘案件毋許隨帶多人止准單騎往詣登時立讞使該差役無所施其伎倆更於質訊之時就詢原被告差役有無詐索如有前項情事輕則責革追贓重則通詳究擬以除民害而杜訟端自示之後倘再不知隨時訪察防範任聽丁役詐索該差仍然乘轎下鄉

一經訪聞或被告發定將該州縣從嚴叅辦將丁役人等照枉法贓科罪決不稍寬其各凜遵毋忽